

Presidente di ABV, sra. Gina Maduro

“Dialogo Social ta tres partido”

ORANJESTAD – Lider sindical sra. Gina Maduro a declara cu el a participa den e recepcion di 5 aña di existencia di Dialogo Social, pasobra sindicato ABV ta kere den e instrumento di consulta y dialogo aki. Di e grupo sindical cu tabata participa den Dialogo Social, ABV tabata e unico cu a presenta den e evento aki cu a tuma lugar siman pasa.

Presidente di ABV, sra. Gina Maduro a declara na Bon Dia Aruba cu como sindicato, e ta lamenta cu nan tabata e unico presente den e recepcion menciona. E no ta kere den un Dialogo Social sin participacion di sindicato.

“Dialogo Social ta tres partido”, el a bisa. E ta agrega cu un dialogo social no ta bilat-

eral ni unilateral. Si e gran grupo di sindicato ta mantene nan posicion di abstene di participa den e dialogo social, sindicato ABV tin cu evalua esaki den su seno. Sra. Maduro ta bisa cu ABV como unico sindicato participante den Dialogo Social lo ta para hopi suak. “Un sindicato so no por bringa pa bienestar di e clase trahado.

Dialogo Social

“A nos si como ABV ta kere den Dialogo Social”. E ta considera cu esaki ta un vehiculo pa por yega na cosnan grandi pa pais Aruba.

Igualmente e ta recorda cu e formula di dialogo social ta bin di Organizacion Internacional di Labor, unda generalmente ta wordo envolvi tres partido na mesa, esta go-



bierno, gremio di dunado di trabou y sindicato.

E ta reconoce cu aña pasa tabata uno di turbulencia pa Dialogo Social, ya cu tabatin diferente decision no mucho popular cu mester wordo tuma. Entre nan atencion na e fondo di pension y di AZV cu mester bin cu decisionnan pa scapa e fondonan pa nan

keda sostenibel.

El a bisa cu tur participante den dialogo social ta consciente –aunke dunado di trabou no ta gusta scucha esey– cu esun cu tin e presion mas halto ta e sindicato; ya cu nan mester atende no solamente cu nan miembronan sino tambe cargue den pueblo, ya cu hopi biaha nan ta haya

hopi critica.

El a bisa cu ora gobierno a anuncia aumento riba tarifa di coriente, ABV tabata e prome sindicato cu a mustra su mal contento te hasta a manifesta contra e aumento aki. Mientras cu mayoria di e sindicato a manda nan malcontento por escrito pa Prome Minister di Aruba. □